

In oc se amal hual Pablo in lanahuatini quinmijcuiluilic in laneltocanijmes pa Tosalónica

*Pablo huan yehuanten cayihual quinmijcuiluilía
in laneltocanijmes pa Tosalónica*

¹ Tehuanten Pablo huan Silvano huan Timoteo antimitzijcuiluililo amhuanten pa Tosalónica, amhuanten hual anquineltoca Dios toTajzin huan in Tata Jesucristo.

² Ma Dios toTajzin huan in Tata Jesucristo anmijchihuilican inminlachihualisli cuali calica anmitzquixtía pin ipolehuilisli anmolajlaculisli. Huan ma anmitzmacacan axan huan mojmosta mosehuilisli huan mochi in cuali hual unca ca yehuanten pa anmitzmacasi pampa anmitzlasojlalo.

*Dios quinmilis lacames laijlaculi pampa lamisi
polehuisi pan tonali hual mocuepas Cristo*

³ Tocnían, monequi pa ticsehuisi Dios mojmosta pampa anunca tocnían, jan quinami unca cuali pa yojque ticchihuasi. Unca cuali pampa anquineltoca Cristo míac, huan momiactía anmolaneltocalisli. Huan mochi sejse ca amhuanten anyuli anquinlasojlatica míac. Huan anmolasojlalisli momiactía pa moxtin in oc sequin ca amhuanten mojmosta.

4 Pampín, tehuanten, pan tonalijmes hual ticate capa monechicujtate ilaixpan Dios oc sequin laneltocanijmes, amo quiman tiquilcahualo pa tilajtusi ca míac lanequilisli quinami amo anmocahua pa anmopepenialtis mochi in amo cuali hual anmijchihuilijtate. Tilajtulo noje quinami amo quiman anmocahua pa anquineltotas Jesuscristo, mas que anmitztojtocalo pa anmitzcocoltisi. Quema, anmitzpanujtica míac amo cuali hual anmijchihuililo. Huan amhuanten anmopepenialtía pa anpanus mochi inon amo anquinlacuepilijtica.

5 Pampín, ticmatilo Dios quinchihuilía moxtin hual mohuiquilía pa canasi. Anpanujtica lacocotili pampa anquixtoca quinami Dios huelitia. Pampín Dios quijtúa pampa ammonotza pa anyulis capa yihual huelitia.

6 Huan ticmatilo pampa Dios quita cuali pa quinlacuepilis yehuanten jan quinami yehuanten anmijchihuililo.

7 Amhuanten hual anmijchihuililo amo cuali, Dios quita cuali pa anmitzmacas mosehuilisli pa anmoyolo ca tehuanten noje quiman nesis quisistica pin cielo (ilhuicac) in Tata Jesus. Yihual hualas ca ilanahuatinijmes pin cielo hual quipialo ichicahualisli, milintihuasi quinami tixuxli.

8 Huan quinmacas lacocoltilishi yehuanten hual amo quiximatiло Dios, quema, yehuanten hual amo quineltocalo ilamachiltisli cuali toTata Jesus.

9 Yehuanten cate hual yalo panulo lacocoltilisli hual amo quiman lamis, lacocoltilisli hual amo lamis quinmijlacus. Cayasi laijcuaniли pa ilaixpan

Dios huan ilaixpelalisli chicahuac ilahueliltlisli, amo huil mocuepasi ca yihual.

10 Quema, in panus pa in tonali quiman hualas Jesús. Cuaquinon quipiasi Jesucristo ilaixpelalisli chicahuac yehuanten hual quinlajtultic pa yesi ilacames chijchipahuac pa inminyolo. Yehuanten momahuisultisi quiman quitasi moxtin yehuanten hual quineltocalo Jesús. Huan yoje anquichías amhuanten noje pa Tesalónica pampa anquineltocac in hual antimitzilje quinami unca in Tata Jesús.

11 Yoje, pampa ticmatilo inon, tehuanten noje amo timocahualo pa tictajlanisi Dios pa amhuanten. Yihual anmitznotzac pa anquineltocasquiaya ilamachiltlisli cuali. Pampín tictajlanilo pa antimitzitas quinami lacames hual monotzaloaya pa yihual anmitznotzasquiaya. Noje tictajlanilo Dios pa yihual lamis quichías ca ilahueliltlisli mochi hual anquinequi anquichía hual unca cuali. Anmolaneltovalisli anmitznextilis len monequi pa anquichías. Pampín tictajlanilo pa yihual anmitzpalehuis pa anlamis anquichías in hual anquichía amhuanten.

12 Cuaquín, quiman oc sequin quitasi mochi in cuali hual anquichía, noje tictajlanilo Dios pa yehuanten noje quitasi ca amhuanten mochi hual huil quimatilo inahuac toTata Jesús. Noje tictajlanilo Dios pa itoca Jesús mochías hué huan caultichin ca amhuanten anmoyolo. Huan tictajlanilo pa anmochías hué pampa anyultica inahuac yihual. Huan anquipía mochi inon san pampa anmijchihuilic Dios in cuali hual amo quiman lamis.

2*In lacal mochi amo cuali*

¹ Axcan, tocnán, ma antimitzilican quinami panus in tonali quiman hualas toTata Jesucristo. Inon cayas quiman ticayasi lanechiculi pa tincnamiquisi.

² Antimitzililo inon amalá anmomacajsitiquisa sinda cuajnesi anmitzililo len yes lajtol sequin lacames. No, yajmo ximomajtitiacan sinda anmitzililo pampa lamic ajsic in tonali hual mocuepac pan lalticpan in Tata. Amo xiquinneltocakan sinda cuajnesi anmitzililo pampa tiquilije inon tehuanten pan ipampa se ijyecal o lajtol o se amal hual quijtúa pampa tehuanten tiquijcuiluje.

³ Amo ximomacahuiltican pa amaqui anmitzcuajcuananas nindeno, pampa san ajsis in tonali quiman ajsije in tonalijmes capa quicahuasi ilamaxtilisli Cristo in míac ca yehuanten hual quijtulo pampa quineltocalo Cristo. Panus inon, cuauquinon nesis se lacal hual amo quineltotas Dios ilajtomes huan amo quineltotas inminlajtomes lacames. Yihual yes se lacal hual Dios yahui quijcuanía pa yajmo cayas capa unca Dios.

⁴ In lacal molalis pa mochías ilacocolini in ni-man hué, hual unca Dios. Cayas in lacocolini hué pa mochi innojen hual lacames quinmolancuacuetzililo quinami inmindioses. Quema, yoje quichías, molalis pa huelitis pa calijtic Dios itiopan hué. Lacuajcuamanas, lamachiltitica pampa yi-hual Dios.

⁵ ¿Amo anquijnamiquía quinami annimitziliaya innojen lajtomes quiman ayamo nimohuicac capa amhuanten?

⁶ Huan axan anquimati aqui quitzacuilitica pa ayamo nesis in lacal elehuis hual amo laneltocas. Ma yoje, yihual in lacal niman elehuis, quema, nesis pan tonali hual Dios quilalic.

⁷ Ticmatilo pampa cate lacames hual yultialo amo quinneltocate Dios ilajtomes. Amo ticmatilo leca unca yoje. San ticmatilo pampa unca se hual quintzacuilitica yehuanten hual molalilo ipan mochi. Quintzacuilitica pa yoje ayamo huelitisi pa mochi lalticpan. Yihual quintzacuiliticas huan cayas laijcuanili pa yajmo yes pin lalticpan quiman lamis ca ilatzacuulisli hual Dios quilalilic.

⁸ Cuaquinon nesis in lacal hual amo laneltoca, yihual quinlaicanas moxtin hual molalilo ipan Dios. Ma yoje, in Tata Jesús quimictitiquisas in lacal hual amo laneltoca. Quimictis ca iifyul icamac, quisulahuas. Huan lamis mochi ilahueltilisli in lacal hual amo laneltoca. Jesús quisulahuas jan ajnaxcan quiman in lacal quitas Jesús ilaixpelalisli pa in tonali hual mocuepas Jesús pin lalticpan.

⁹ Ma yoje, pa in tonalijmes hual ayamo hualas Jesús, in lacal hual amo laneltoca yahui huelitia pan lalticpan. Satanás quimacas lahueltilisli pa huelitis. Quimacas mochi lahueltilisli pa quichías mochi islacatilisli hual quinmahuisultis lacames ca lamajtilisli.

¹⁰ In lacal quipías mochi lahueltilisli pa quincuajcuamanas yehuanten ca mochi lachihuialisli hual amo cuali. Huan Satanás quinextilis in la-

cal quinami quichías inon. Yoje quincuajcuamanas, huan yehuanten polejtiasi pampa amo quinequiloaya quicaquilo Jesús ilajtol pa quinel-tocalosquiaya in hual melahuac. Yoje sinda quineltocaloaya, cuaquín cataloaya laquixtili pin ipolehuilisli inminlaijaculisli.

¹¹ Pampín Dios quinchihuilis len hual quin-laneltocaltis in islacatilisli. Quijusi pa inminyolo pampa in lacal hual amo laneltoca unca Dios. Quema, yihual in lacal quinmilis pampa yihual unca Dios.

¹² Pampa inon, Dios yahui quinmaca lacocoltilisli moxtin yehuanten, huan amo quiman mo-quixtisi capa unca inon. Quinmacas lacocoltilisli pampa amo quineltocalo ilajtol Jesús hual unca melahuac, huan amo mocahualo pa quixtocasi quichihuasi len amo cuali.

*Dios quinlajtultic pa quinquixtis pin polehuilisli
in laneltocanijmes*

¹³ Ma yoje, amhuanten, tocnián, Dios anmitzlasojla, huan mojmosta ticate ticsejticate Dios pampa amhuanten anunca tocnián. Anmitzlajtultic pan tonalijmes quiman ayamo quipehualtic in laliticpan. Anmitzlajtultic pa anmitzmacas inon hual iyaxca hual unca pa Dios ixolomes. Inon anmijchihuilis pampa anmitzlalilic in Espíritu Santo pa anyulis yoje chipahuac pa anmoyolo, huan pampa anquineltocac Jesús ilajtol hual mochi unca melahuac.

¹⁴ Cataya pampa inon Dios anmitznotzac pan ipampa in lamachiltisli cuali hual antimitzlamachiltije. Anmitznotzac Dios pa anquipiasquiaya anmolajco ilaixpelalisli

cualtichin toTata Jesucristo hual cayas
anmoyaxca.

¹⁵ Yojque, tocnán, amo quiman ximocahua-can pa anquineltotas ca mochi anmochicahual-isli mochi in lajtomes hual antimitznextilije pan ipampa tolajtol o pan ipampa in hual antimitzi-jcuiuilijje.

¹⁶ Yihual toTata Jesucristo huan Dios toTajzin techlasojlalo huan amo quiman mocahualo pa techlacahualtisi. Yoje ma tejchihuilican noje pa ticchiasi ca míac lanequilisli in niman cuali hual quipialo pa techmacasi tehuanten. Inon yalo techmacalo pan ipampa inminlachihualisli cuali hual amo quiman lami.

¹⁷ Ma anmitzlacahualtican anmoyolo, ma anmijchicahualtican pa yoje huil anquichías pa mochi tonalijmes míac hual cuali, huan pa mochi tonalijmes huil anquijtus in hual unca cuali.

3

Xiclajlanican Dios pa tehuanten

¹ Axcan, tocnán, ma antimitzilican inon pa tilaquisisi ca in amal. Xiclajlanican Dios pa tehuanten, pa camo ticayasi latzacuali pa camo tiejsehuisi ticuicasi ilajtol in Tata ca capic yes. Quema, pampa ticnecticate pa oc sequin lacames quitasi quinami Dios ilajtol quipía lahueltilisli hué. Inon quitasi jan quinami amhuanten anquitac ilahueltilisli hué ilajtol. Anmitzhueliltic ilajtol pa anyulis quinami quinequi toTata.

² Noje xiclajlanican Dios pa yihual techquixtis pa camo timiquisi quiman yes ticayasi capa lacames ej'elehuis hual amo mocahualo pa quichihuasi len amo unca cuali. Amhuanten anquimati pampa amo cate míac hual quineltocalo Jesucristo.

³ Ma yoje, mojmosta huil ticmatilo pa toyolo pampa in Tata quipía mochi chicahualisli. Ticmatilo pampa yihual anmijchicahualtis huan anmitznapatis pa camo anmitzmatocas Satanás.

⁴ Huan amo inon san. In Tata techmachiltía quinami anquineltoca cuali amhuanten. Pampín ticmatilo pampa anquichijtica huan anquichijtías len yes antimitzililo.

⁵ Huan in Tata hual unca pa anmoyolo ma anmitzlaicana pa anquilasojlas Dios huan pa anquimatis anmopepenialtis ca chicahualisli mochi hual anmijchihuilido yehuanten hual molalilo anmopan. Yojque Cristo mopepenialtic ca chicahualisli mochi hual quichihuilije yehuanten hual molalije ipan.

Monequi pa tequipanusi pa molacualtisi

⁶ Antimitzililo, tocnán, quinami quijtúa in lamaxtilisli huan ilahueliltlisli toTata Jesucristo, antimitzililo pa anmijcuanis pa capa amo ancayas ca aqui yes ca tocnán hual mojmosta amo quinequi tequipanúa. Yihual hual amo quinequi tequipanúa amo yultica yoje quinami antimitznextilije.

⁷ Inon antimitzililo pampa amhuanten anquimati quinami anquipía pa anquichías mochi quinami tehuanten ticchihuanijme. Amo

tilatzejtineminijme nepa in tonalijmes hual ticatanijme ca amhuanten.

⁸ Amo tijcuanijme ilacualisli amaqi sinda amo tictlaxlahuije. Quema, ca míac tequipanulisli chicahuac titequipanunijme yihualitonali pa layúa huan pa semilhuil pa timolacualtilosquiaya. Amo ticnequiloaya pa anquipiasquiaya pa antechlacualtis, amo jan se ca amhuanten.

⁹ Amo cataya pampa amo unca toyaxca pa antimitzililosquiaya pa antechlacualtis. No, cataya pampa ticnequiloaya pa anquitasquiaya quinami tehuanten ticchihualoaya, cuquinon anquichasquiaya quinami tehuanten.

¹⁰ Huan noje innojen tonalijmes hual ticataloaya ca amhuanten, inon antimitzilinijme: Sinda amo quinequi tequipanúa se, ma camo lacua.

¹¹ Antimitzililo innojen lajtomes pampa techlamachiltlo cate sequin ca amhuanten hual amo yulticate cuali quinami monequi pa yulisi. Amo quinequilo tequipanulo huan mojmosta calpanujtinemilo quinmacatinemilo tequil oc sequin.

¹² Pampín, yehuanten hual cate quinami innojen, tiquinmililo huan tiquinyantilo ca ilahueliltisli ilamaxtilisli in Tata Jesucristo pa tequipanusi yehuanten pa molacualtisi. Yojque mosehuisi pa inminchan, yajmo calpanujtinemisi pa quicuasi len amo inminyaxca. Yojque quicuasi inon hual inminyaxca.

¹³ Huan amhuanten, tocnían, amo xisiahuican pa anquichías len unca cuali.

¹⁴ Sinda unca se capa amhuanten hual amo quinequi quineltoca tolajtol hual tiquijcuilulo pa

in amal, cuaquín ximomachiltican pa anquimatis aqui unca in se, huan amo ximomacahuiltican pa anquichías nindeno ca yihual, pa yojque yihual pinahuas.

¹⁵ Ma yoje, amo xiquijtucan pampa yihual se tolacocolini tehuanten. Dios quita cuali pa anquilaquetzilis pa quimatis quinami monequi pa yihual quineltocas len Dios quilía. Pampín, xi-claquetzilican quinami anquinlaquetzilía moxtin tocnián.

Laquisa quijcuilúa ca latuchihualisli

¹⁶ Axcan yihual in Tata hual quimaca mosehuilisli huan quipía mochi hual unca cuali pa tehuanten, ma anmitzmaca mochi inon pan mochi tonalijmes huan ca mochi lachihualisli. Ma caya ca amhuanten ammoxtin in Tata.

¹⁷ Nehual Pablo annimitzpialtía, huan niquijcuilujtica in nolapiatilisli ca nehual nomajma. Yojque anquimatis pampa nehual neli nictilanía in amal, yojque nilajcuilúa.

¹⁸ Ma caya ca amhuanten ammoxtin in cuali hual san toTata Jesucristo huil tejchihuilía.

**Ilajtulisli Yancuic toTata Jesucristo
New Testament in Nahuatl, Michoacán
(MX:ncl:Nahuatl, Michoacán)**

copyright © 1998 Wycliffe Bible Translators, Inc.

Language: Nahuatl, Michoacán

Translation by: Wycliffe Bible Translators, Inc.

Náhuatl, Michoacán [ncl], Mexico

Copyright Information

© 1998, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Nahuatl, Michoacán

© 1998, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 18 Apr 2025 from source files
dated 29 Jan 2022
da3cba3e-3a5e-5fce-927d-24a57a332bf9